

157
B. J. D.

De

CONTRACTIBUS INNOMINATIS, DISPUTATIONEM,

Ex

L. Naturalis V. D. de PRÆSCR. VERB.

Consensu Magnifici ꝑꝑTORUM Ordinis,

PRÆSIDE

VIRO Nobilissimo, Consultissimo, Excellentissimoq;

DN. JOACHIMO NERGERO,

Gryphimonte Silesio, J. U. D. & Pand. Prof. Publ. Celeberrimo,


Curia Electoralis, Scabinatus & Fac. Jurid. quæ hîc loci sunt, ut & Ju-
dicii Ducalis, quod in Marchionatu inferioris Lusatiæ est, Ascesfore

Gravissimo, h. t. DECANO

Spectabili;

Dn. Patrono ac Præceptore æternis obsequiis

devenerando,

 *Quam conscripsit,*

proponet publicè,

GEORGIUS MICHAEL HEBERUS,

Wittebergenfis.


In Auditorio ꝑꝑtorum ad d. XXVI. Septembr.

Horis antemeridianis.

WITTEBERGÆ,

Literis MATTHÆI HENCKELII, Acad. Typogr.

ANNO c 10. 10c. LXXIV.



Num. I.

Patriæ & Patronis hæc danda opera est, in quâ occupare nunc industriam meam ingredior. Satis habebit ea, satis Patroni, si ostendero, voluisse me proficere, etsi profecerim parum aut nihil. Voluntati meæ serviet elegantissimæ Legis argumentum, quam in fronte signavi. Hujus certè dignitas jucundissimumq; circa causas investigandas studium cupida rationum ingenia meritò invitare potest & debet. Interpretationi nostræ si fortè consuetis disputantium legibus respondebit minùs, odium & invidiam deprecor. Stabit pro me primò literarum libertas, deinde quod non sine ratione, sed ut decet rem per causas contemplaturum, susceptum hoc institutum est; tandem quia non vulgaris nominis Dd. hanc viam præverunt, quorum ingeniis me innutritum gaudeo.

II. Primum omnium historia ejus argumenti, cui exponendo operamur, colligenda ex Legibus est: Legibus succedent scripta Actorum, à quibus cum discesserimus, additis, quæ in utramque partem disceptari solent, omnem rem proposito quodam summo principio, breviter expediemus.

III. *L. Juris Gentium 7. ff. de Pat.* ordinem historię Legum explicabit: quam in tractatione de conventionibus utramque paginam facere omnes loquuntur Dd. qui ad eam scripserunt, præter Accurs. Bart. Enguinarius, Duarenus, Fortun. Cujac. Connan. Coraf. Ferd. Mendoza, alii. Eam sic exordior. Omnis Contractus in conventionem quadam seu pactione fundatus est, aut cum hac ad minimum conjunctus. Conventionis enim verbum generale est, ad omnia pertinens negotia, de quibus negotii contrahendi transigendi quæ causa consentiunt, qui inter se agunt. l. i.

§. *conventionis*. 3. *D. de Pact.* adeo ut nullus sit contractus, nulla obligatio, quæ non habeat in se conventionem, *eod.* Est autem Conventio, scilicet quod idem valet, Pactio, duorum pluriumve in idem placitum consensus. *l. 1. §. 2. D. de Pact.*

IV. Conventio in Nominatam & Innominatam tribuitur. Nominatam appellamus eam, quæ nomen habet proprium. Innominata, quæ nomen non habet. Illi proprium est, imò essentialiam contingit, parere obligationem & actionem; huic sufficit, ut tunc obligationem pariat, si causa, id est, datio vel factum, subsit. Ita enim Ictus habet in *l. 7. pr. & §. 1. & 2. D. de Pact.* Juris Genitium conventiones quædam actiones pariunt, quædam exceptiones. Quæ pariunt actiones, in suo nomine non stant, sed transeunt in proprium nomen Contractus, ut, Empt. Vend. Loc. Cond. Societ. Commod. Depos. & cæteri similes. Sed si in alium contractum res non transeat, subsit tamen causa, eleganter Aristoteles Celso respondit, esse obligationem, & hinc nasci civilem obligationem.

V. Conventiones, quæ nomen suam generale commutant, transeuntq; in proprium nomen alicujus Contractus, etiam Contractus nominati vocari solent, cum Ulp. in *l. 7. §. 1. & seq. d. t.* finiat eos conventiones non retinentes nomen generale, sed transeuntes in speciale aliquod nomen, pariens obligationem & actionem.

VI. Conventiones Innominatæ, scilicet quæ non transeunt in certum nomen Contractus, vel continent synallagma, vel non continent (uti nuda pacta) Quæ synallagma continent, Contractus Innominati vocantur, & singularem quandam obligationem pariunt Hos Innominatos Contractus Ictus in *l. 7. §. 1. d. t.* negotia esse, ait, quæ ob causam, quæ subest, obligationem pariunt: Ut puta, dedi tibi rem, ut mihi aliam dares, ut aliquid facias; hoc synallagma, i. e. contractus est, & nascitur civilis obligatio. Sunt verò in universum quatuor causæ: Do, ut des. Do, ut facias. Facio, ut des. Facio, ut facias.

VII. Prima causa faciens, ut negotium nomen Contractus Innominati fortiatur, est, Do, ut des; quando rem do, ut rem accipiam: & nascitur ex hoc contractu civilis obligatio, actioq; inde descendens, præscriptis verbis appellatur. Causa appellationis est, quia quando vulgaria atqve usitata actionum nomina deficiunt,

præ-

præscriptis verbis actione agendum est. *l.2. D. de Præscr. Verb.* in quam necesse est confugere, quotiens Contractus existunt, quorum appellationes nullæ jure civili proditæ sunt. *l.3. eod.* cum ea sit natura rerum, ut plura sint negotia, quam vocabula, *l.4. eod.* In hac autem actione id venit, non ut reddas, quod acceperis, sed ut damneris mihi, quanti interest meâ, de quo convenit, accipere; vel si meum recipere velim, repetatur, quod datum est, quasi ob rem datum, re non securâ. De periculo superest quæstio, ad quem pertineat in hoc contractu? Et siquidem scyphos tibi dedi, ut Stichum mihi dares, periculo meo Stichus erit, tuq; duntaxat culpam præstare debes. *l.5. §.1. D. de Præscr. Verb.*

II X. Secunda causa est, Do, ut facias; quando rem pro facto do. Affinis hæc videtur contractui Loc. Conduct. uti prima Emptioni Vend. Sed cum in hoc pecunia factum æstimans interveniat necesse sit, apparet differentia, cum hic res pro re detur. Itaque etiam ex hac causa peculiaris actio nascitur; primò civilis, in hoc, quod mea interest, vel ad repetendum, condictio. Sejungenda autem hic notabiliter facta locari solita, ab iis, quæ locari non solent. Si pro factis locari solitis rem dō, adductæ actiones competunt. Idem valet, si factum sit tale, quod locari non possit: sive certum tempus adjectum est, intra quod fieri possit, idq; cum potuisset perfici, re nondum perfectâ transferi; sive finitum non fuit, & tantum temporis consumtum non sit; ut potuerit debueritq; fieri; tunc enim condici ei potest, vel præscriptis verbis agi. Aliiter res se habet, cum tibi aliquid dedi, ut tu faceres aliquid, tuq; feceris, mea autem res data evicta sit; hoc enim casu si sciens dedi, de dolo, si ignorans, civilis in factum in me danda erit actio. *d. l. 5. §. 2.*

IX. Subit tertia causa, quæ est, Facio, ut des. Ex hac nulla civilis, talis scil. de quâ *d. §. 2.* exposuimus, obligatio producitur: Si tamen dare cessaveris, postquam ego feci, de dolo dabitur. *d. l. 5. §. 3.*

X. Quarta causa est, Facio, ut facias. Ut hæc species causæ rectè intelligatur, plura esse consideranda, Jctus ait, ne separanda confundantur. Per exempla nimirum rem clariorem reddere conatur Paulus. Pauli exempla cum Franzkio eloquar *T. de Præscr.*

Verb. n. 50. seqq. Primum est, si paciscar tecum, ut tu à meo debitor Carthagine exigas, ego Romæ a tuo alterum; ut tu in meo, ego in solo tuo ædificem: Ibi mandatum contractum esse videtur, dum pecunia sine voluntate creditoris nulla alieno nomine jure exigì potest: verùm cum mandatum gratuitum esse debeat, & expediri sumptibus & impensis mandantis *l. 13. §. 1. b. t. l. 10. §. 9. ff. Mand. l. 46. §. licis 6. D. de Procur. l. 1. C. Mand. hinc a.* dum utriusq; factum ad summam computatur & compensatur, ut cujusq; factio omnes quoq; impensæ ultro citroq; cedant, negotiū sumtibus expediētis expediatur, & dehinc notissimos mandati terminos egrediatur, aliam esse naturam hujus negotii quàm mandati, dicendum erit. Et quanquam Jctus sibi ipsi objiciat, haut consequens esse, cum aliquod negotium egreditur terminos mandati, id statim alio loco quàm mandati accipiendum esse; tùm quia mandatum ex pacto suam naturam excedere potest, ut & custodiam præstes, & non ampliùs quàm decem in exigendo impendas; tùm quia hinc non exceditur natura mandati, postquam mutuum officium præstatur, & mutux impensæ fiunt, quæ postmodò judicio mandati, quod b. f. est, compensantur, & pro non factis habentur *l. 2. D. de Compens. l. 4. C. eod.* respondet tñ. Paulus, fieri id quidem posse, si eadem semper impensarum quantitas fieret, sed quoniam hoc non fit, sed modò unus tantùm, modò majores quàm alter impensas facere solet, idcirco propter dubitationes in judicio Mandati, si illud locum haberet, *exoriendas*, tutius esse, ut præscriptis verbis actio, quæ quando proprium nomen invenire non possumus *l. 1. pr. b. t.* competit, detur, quæ actio Mandato similis erit, hoc est, sicut actione Mandati Mandatarius ad præstationem damni ex dolo & culpa sua contingentis tenetur, ita & in actione hac præscriptis verbis mutui hujusmodi debitorum exactores aut ædificatores ad similia in exigendo & ædificando obligati erunt. ita Franzk. hunc §. illustrat, dictaq; insuper ad superiores articulos, qui vel Emptioni vel Locationi similes sunt, extendenda monet.

XI. Jctos nostros adire nunc interest, quidq; hi interpretando assecuti sint, promendum. Quæ causa sit, quod alii Contractus Nominati, alii Innominati dicantur, persequi ante omnia instituant. Et sapè est hæc quæstio in illarum numero, quæ ad nos per-

perrinent. Ea enim quæ de conventionibus præfati sumus, quasi ab
altiore origine exorsi adduxim. *Bart. de Albor. l. 2. de Art. Cōtr. t. 18.*
rīsu hanc quæstionē excipit, & mera Jctorū commenta esse tradit.
Cum verò hic nimis duriter in Jctos consuluisse videatur ple-
risque, cum compertum sit, quantā Philosophiā, eāque non si-
mulatā *l. i. pr. ff. de. J. & J.* imbuti Jus Civile tractaverint Ro-
mani, hinc est, quod alii existiment, Nominatis Contractibus ab
ipso Jure Gentium indita esse nomina, denegata Inominatis i-
deo, quod illos communis omnium consensus & approbatio
tanquam magis opportunos ad commerciorum usum receperit,
hos, ut non ejusdem commoditatis, nisi quatenus justa subsit cau-
sa, prorsus rejecerit, iniquum existimantes, ex simplici conven-
tione ante implementum aliquem adstringi ad præstandum de
quo convenit. Quæ sententia placuit Bald. Alex. Connan. plu-
ribus. A quibus tamen *Ferdin. Mendoza l. 3. Disp. 30. c. 2. n. 3.* maxi-
moperè dissentit : Neque enim putandum esse, scribit, Jus Gen-
tium, quod summa ratio Naturæ est, dedisse nomina & obligatio-
nem emtioni & reliquis nominatis conventionibus, & his, quas
Innominatas dicimus, denegasse, nec se deprehendere posse ait,
quā rationem majorem fidem exigat in unis, quàm in aliis, cum in
utrisque implendis eadem sit æquitas, & in violando eadem ini-
quitas. Argumentum Mendozae plenius exequitur *Pich. Comm.*
J. i. d. Aft. g. 27. num. 14. dicitque : Si propter frequentiam cre-
brumque usum Emt. Vend. similesque conventiones Nominatæ
dicuntur, permutationem etiam, quam prisca tempora frequen-
tissimè celebraverunt, ut historia testatur, & *Arist. Pol. 1. c. 6.*
Etb. 5. c. 5. Jctus l. 1. D. de Contrab. Emt. Nominatum Contractum
esse, dicendum foret, quod tamen nemo dixerit, si Jcto in *l. 1. §.*
2. D. de Rer. Perm. credimus. Facit igitur *Mendoza d. l. c. 3. n. 4. cum*
Hotom. in Tract. de Pass. & ad Jus Civile Rom. referendum esse
censet, quicquid de hac divisione in Contractus Nominatos & In-
nominatos quæritur. Quod ut luculenter intelligatur, scien-
dum cum illis fuerit, Juris Gentium conventiones quasdam, quæ
frequentiores sunt, & maximè ad usus humanos necessaria, civi-
lem obligationem producere. Harum conventionum actiones
quia in judiciis & commerciis frequentes erant, à Prudentibus

certis formulis, solennibusque verbis comprehensas fuisse, porro notandum, ne eas populus prout veller, institueret, l. 2. §. *Deinde 6. D. de Or. Jur.* Earū igitur illas, quæ in factis olim cōsistebant & postea in Albo Prætorio certas verborū formulas cōtinebant, generale nomen amisisse, & peculiari suarum actionum nomine appellatas esse, indeque Nominatas dictas: Innominatas verò, quarum causa prisca illis temporibus actiones nullæ compositæ fuerunt, quod minus usitatæ essent; & inde in generali conventionis nomine mansisse. Ut autem scrupulum de permutatione injectum removeant, inventum pecuniæ usum effecisse ajunt, ut permutationis contractus cæteris validior olim & frequentior in desuetudinem abiret, indeque nec à Rom. inter Nominatas conventiones reciperetur. At verò etiam jam apud Græcos aliasque gentes *Emt. Vend. Loc. Cond.* & similium nomina, audita sunt, ante R. Urbem conditam; haud negaverim, respondet Mendoza, ultra generale nomen eis conventionibus aliud fuisse, sed illud assero, certas, præscriptas, solennesque & nominatas actiones in iis tantummodò apud Rom. admissas; unde & illæ Nominatæ conventiones appellatæ sunt. Recensui ferè sententias Dd. qui longiùs præprimisque subtiliter rem arcessere ab initiis visi sunt: nam ut alii prolixas commentationes fugiunt, ita & hujus quæstionis faciunt compendia: *Wesemb. Dn. Struvius, Treutl. Ekbolt.* & similes, inde hujus divisionis causam repetendam esse perhibent, quia naturā rerum conditum est, ut plura sint negotia, quàm vocabula, l. 4. *D. de Præscr. verb.* hinc adeò evenire, ut, cessantibus proditis & vulgaribus contractibus, non appareat, quomodo redigi ad ordinem contractuum nominatorum queant, eò fieri, ut ad innominatos sit recurrendum.

XII. Ex his intelligitur per definitionem nunc cognoscendum esse, quid contractus innominati sint, in quorum originem hætenus inquisivimus. Dabimus autem primas definiendi partes *D. Franzk. t. de Præscr. Verb. n. 1. seqq.* qui, ut præ cæteris omnibus in hac materia ingenium ostendere voluit, ita etiam imprimis quid præstiterit, videndum. Finit is Contractum Innominatum, quod sit ob rem datio ex conventionione descendens, & proprio nomine carens. Quò hæc definitio percipi possit, multa in ante-

antecessum notanda suggerit. Aliud esse ait, ob rem dare, aliud
 contrahere, vel contractum innominatum celebrare. Ob rem
 dare, esse, generaliter rem dare, ut alia sequatur; Contrahere, ef-
 se propriè, præviâ conventionem ad dandum vel faciendum ultrò
 se obligare, *l. 19. D. d. V. S. &* ex contractu ob rem dare, ex conven-
 tione ultrò citroq; dare vel facere. Ob rem dare porro generali-
 us esse, & magis facti, ad Jus Naturæ spectans, quo omnia sunt
 communia, distinctio dominiorum nulla: contrahere speciali-
 us esse, & magis ad Jus Gent. referri, *l. penult. D. de Praeser. Verb.* quò
 & distinctio dominiorum introducta est, & consecutæ conven-
 tiones, quibus quâque de re permutandâ inter homines agi posset,
 Tum necesse esse, differit, cum innominati contractus contracti-
 bus accenseantur, ut conventio hic præcesserit, quò ita differen-
 tia specifica inveniatur inter contractus innominatos, & nudam
 ob rem dationem. Quæ, uti quoad ex natura rei progressus est
 Autor, tolerari queunt, sic tamen comparata sunt, ut bona occa-
 sio sit mentem ejus aliunde interpretando adjuvare. Quando
 enim ait, ob rem dare magis facti esse & ad Jus Naturæ spectans,
 quo omnia sunt communia, hæc sententia eò accipienda est, non
 ut simpliciter communionem rerum naturaliterque admitten-
 dam esse statuamus, sed quod vel ab initio sint communia, ante-
 quam ab alio occupentur, vel quod etiam post occupationem
 quædam communia maneant, & omnibus ex æquo liberè usur-
 panda exposita sint. vid. ipse *D. Franzk. t. Comm. Divid. n. 5. p. 312.*
Genes. c. I. v. 28. c. 1. dist. 3. c. 7 & 9. dist. 1. per hancnamque commu-
 nionem non omne tollitur dominium, siquidem ante bonorum
 distinctionem dominium est facultas justa utendi re communi;
 sive, ut *Grot. d. J. B. & P. l. 2, c. 2. n. 2.* loquitur: Usus universalis
 Juris erat tùm vice proprietatis. Alioquin enim cum Philoso-
 pho *Pol. 1. c. 2. 3. & l. 5.* Jus Naturale potius in Civitate quære-
 mus, ubi ex justo distributivo dominia rerum jam distincta sunt.
 Quod tamen iterum eò intelligimus, ut distributio possessionum
 non tollat omnem communionem vel usu ralem, *Arist. 2. Polit. 3.*
ibiq; Paraphrastes p. 117. Dn. Feld. El. Jur. Un. part. 4. m. 5. §. 4. De
 cætero Franzkii sententiæ adjicimus, ob rem dationem non ex-
 cludere conventionem aliquam, quippe quam ad omnia

de quibus negotiis contrahendi transigendi quæ causa consentiunt, qui inter se agunt, pertinere, ex *lega 7. §. 3. D. de Pact.* adstruximus. Facile interim largimur, dationem ob rem magis facti esse, si verba eò interpreteris, dationem ob rem potius respicere ad dationem vel factum, quam ad consensum. Non enim solum consensum parere obligationem sed & dationem vel factum intervenire debere, facile nobis persuadet *l. 1. §. 2. ff. de R. Perm.* ubi de permutatione, contractu innominato, scribitur, eam ex re tradita initium obligationi præbere. *Jung. d. l. 1. §. 2. verb.* Alioqui si res nondum tradita &c. *D. Struv. Exercit. 25. lb. 9.* cum veteribus JCtis definit, quod sint conventiones, quæ in aliud nomen, seu formam certam contractus non transeunt, propter causam tamen, quæ ipsis subest, actionem civilem pariunt. Vel: Quod sint conventiones, quibus varia & indefinita negotia celebrantur, & præstito quodam, alter ad præstandum id, de quo convenit, rursus obligatur: *conf. D. Tabor lpr. Elem. p. 3. sect. 4. lb. 15. Bicc. Aur. sect. 4. lb. 16. Habu. in Negt. ad Wesemb. tit. de Præsc. verb.* Contractum Innominatum conventionem esse ait, quæ habet causam sine nomine, sc. specifico seu constitutivo, ut loquuntur. *Vulej. in lpr. R. l. 1. c. 41.* tradit esse negotia, quæ ex Jure Civili nullum nomen habent certum, habent tamen negotium civile, cujus forma generalis est, nec certis limitibus definita. Hic videri cuiquam posset, per hanc definitionem, negotia non satis discerni: Siquidem quædam horum ideò Contractibus innominatis annumerantur, quia incertum ac dubium est, quis Contractus sit celebratus, quædam autem ob eam causam, quia non omnes conventiones generatim sumptæ ad certa & definita negotia, propter sui utilitatem ad actiones producendas confirmata, per naturam rerum redigi possunt, quâ plura sunt negotia, quàm vocabula. Discrimen hoc igitur probè notandum, quod etiam eleganter notavit *Struv. Exerc. 25. n. 2. Petr. Osterm. Disp. 30. Coll. Col. 1. besf. 6.* Omnes tandem DJ. diversis verbis rem eandem exprimere videas, Multum solidi eorum sententiis inesse, uti verum est, ita multum etiam eorundem autoritati tribuendum non diffitemur.

XIII. Ex his definitionibus illud deduci posse putant, vel interventum ad hos contractus eorumque naturam requiri. Textum allegant *l. 1. §. 2. verbis*, permutatio ex re tradita initium obligationi præbet. *ff. de R. Perm. & l. 6. C. eod.* ubi rebus certis traditis, si conventioni non pareatur, actionem præscriptis verbis dandam. ex juris autoritate Imp. rescribunt. Istud itaque pro certo habent, solum consensum in his contractibus non parere obligationem, sed dationem vel factum ab uno requiri, ut alterum quis habeat obligatum: & hanc causam esse, quod hi Contractus non stare in suo nomine, sed causam habere dicantur. *l. 7. §. 2. de Pañ. Bachov. ad Wesemb. h. t. Hahn. ad eund. n. 1.* Sunt tamen quidam, inter quos *Messersius* est, qui propter *l. 3. §. 4. ff. de Cond. Causa data &c.* Contractus Innominatos etiam ante ullam dationem aut factum solo conventionis jure obligationem civ. parere astringit. *l. 1. dub. 37. de Just. L. L. Rom. sed cum Ekholzi judicio t. de P. V. n. 2. p. 264.* Leges pro sua assertionem astringenda nimium torqueat, & ab *Hahn. ad eund. t. n. 1.* satis ad reponendum suppeditetur, de eo non multum laborabimus. Sufficit plerisque consentire, naturam & formam contractuum Innominatorum in eo consistere, quod conveniat inter duos de dando vel faciendo ita, ut cum nominatus Contractus, qui ad certum quoddam objectum, & definitum contrahendi modum est determinatus, non subsit, is, qui dedit vel fecit, alterum sibi obliget ad vicissim aliquid, quodcumque placuerit, præstandum. *l. 7. §. 1. de Pañ. l. 1. §. 2. Verb. ex re tradita &c. de R. P. Struv. Exerc. 25. 16. 10.* Apparet igitur, in Contractibus Innominatis, ut obligatio nascatur, requiri rei interventum, seu ut Ulp. loquitur, ut subsit causa *d. l. 7. §. 1. ut Paulus*, traditionem rei *l. 1. §. 1. de R. P. uti J. Cui explicat*, ex alterutra parte implementum.

XIV. Consequens igitur quaestio est, an ante implementum, & re adhuc integrâ aliqua ex innominatis conventionibus obligatio nascatur? Et naturalem quidem etiam ante implementum nasci *Accurs.* docet ad *l. Perens. 27. C. de Pañ.* cujus sententia communiter à Dd. approbatur, confirmarique posse putant ex *l. 1. de P. V. verb. & hinc nasci* civilem obligationem; quibus verbis inferri existimant, antea naturalem natam esse; *facere*

huc expressius verba d. l. 7. pr. *Juris Gentium conventiones quædam exceptionem pariunt* : quorum viueò exponunt, naturalem obligationem natam fuisse, cum ab ea exceptio producat, quæ Juris Naturalis censetur. *Bald. contra in d. l. petens*, ne naturalem quidem obligationem ante implementum nasci defendit. *Baldum* sequuntur *Martin. Monter. Berenger. Fernand. Minibaca, alii*. Argumenta pro institutò suo hæc affert : si permutatio ex re traditâ initium præbet obligationi, l. 1. §. *it. Emtio verb.* Permutatio autem, de *Rer. Perm. verbum OBLIGATIONI* non solum de civili, sed etiam de naturali accipiendum esse. Item : si conventiones innominatæ conditionales sunt, ut ex earum conceptione constat, ante implementum nec naturalem obligationem producere queunt, ex regula l. *conditionales* 54. l. *cedere diem*, 213. de *V. S.* nec illud prætereundum : quoniam pœnitentia unius ab hujusmodi contractu recedi potest, l. *si pecuniam* 5. verb. sed liceat pœnitere. De *Cond. causa data &c.* Ergo naturalis obligatio ante nata non fuit, quoniam si nata esset, mutui consensus ad eam dissolvendam esset necessarius, ex l. *nihil tam naturale* 36. de *R. J.* l. *ab Emtione* 59. l. *Stichum* 95. §. *naturalis* D. de *solut.* Præterea is, qui ex parte suâ aliquid præstitisset, naturali ratione impediente repetere non posset l. *naturaliter* 13. D. de *Cond. Indeb.* Ex quibus rationibus nec Jure Canon. in *Innom. Convent.* ante implementum obligationem nasci docet idem *Baldus* in l. *cum quæ n.* 13. C. de *Jur. & fact. ignor.* Ad hæc argumenta reponunt, qui prioris sententiæ *Id.* adherent, parum ea posse ad subvertendum immortum Juris principium. Ad *L. 1. §. it. Emt. verb. Perm.* eam de civili obligatione efficacem ad agendum actionem pariente, quæ subsistente causâ, implemento ex alterutra parte secuto, oritur, intelligendâ esse dicunt : arguere id vocem OBLIGATIO : quam de potiori & sic de civili capiendam satis arg. l. 1. §. *Qui in perpetuum ff. si ag. vel. l. Emphyt. pet.* constare, nec obligationem naturalem propriè obligationem esse, notante *Parlador. P. 1. Rer. quorid. c. 9. n. 15.* approbare id insuper definitionem obligationis, pr. *J. de Obl. à Justin.* propositam. Accedere consensum ipsius *JCti* in c. *l. verb. aliogvin.* In eâ cum ab absurdo sic ratiocinari : Quod si ante traditionem oriretur obligatio, nudo consensu eam constitui

stitui diceremus, quod tamen est absurdum: de Civili ergò loqui Paulum, cum de naturali non absurdum, sed regulare sit, eam nudo quoque consensu constitui, qui æquitate subnixus sufficiens est ad naturalis obligationis ortum *l. 1. D. de Const. Pecun. l. Stichum 95. §. naturalis D. de solut. l. cur amplius 85. §. Is natura debet de R. 7.* Falsum & secundum argumentum Baldi esse contendunt, nec enim verum, conceptiones in Innom. Convent. in vim Conditionis fieri; contrarium probare *l. 3. §. 1. D. de Cond. causa data & c. l. naturalis. 5. pr. & §§. seqq. de Praeser. verb.* ubi disertè tradere Menesem ajunt, & ante eum Accurs. Contractum Innominatum non esse, ex quo conditio actui adjiciatur. Distingvendum tamen hîc monent Modum à conditione; Cumq; innominatæ conventiones non in vim conditionis, sed in vim modi concipiantur, obligationis naturalis ortû impediri non posse dicunt *l. cum ab eo 41. de Contr. Empt.* Ut ad tertium argumentum responderi possit, obligationem naturalem simplicem ab respectivâ secernunt: In simplici obligatione locum habere dicentes, ne possit quis repetere id, quod per naturalem obligationem præcedentem solutum est, quia verè debitum est, *l. in diem 10. l. naturaliter 13. de Cond. Indeb.* Quod si autem obligatio non simplex sit, sed respectiva ob implendam causam aliquam de futuro, dicunt, eum, qui implevit si factum tale sit, quod repeti possit, repetere posse, non quidem ex capite conditionis indebiti, sed ex eo, quòd antequam adversarius impleat, permissum est pœnitere. *d. l. si pecuniam, verb. sed cum liceat pœnitere; sine incommodo tamen adversarii. verb. nisi fortè tua inter-* sit *ff. de Cond. Causa data & c.*

XV. Restat, ut quæ actio ex his Contract. Innom. competat, persequamur. *Praescriptis verbis* ea vocatur. Parum interest, aut ad rem facit, an perscriptis verbis cum *Hotom.* legere malis. Hanc ex duplici fonte oriri *Habn. h. t.* tradit, 1. ἀνομάλας, ob probabile dubium, quando subest quidem negotium certum nomen habens, sed dubitatur, ad quam speciem nominatorum contractuum referri debeat, exindeq; illud collocatur inter Contractus Innominatos *l. 1. de P. V. 2.* Ordinariè ex Contractu Innominato. Hæc ambiguitas propterea assignanda fuit, ut tolleretur dubium, quare æstimatoria actio præscriptis verbis appellatur. Quamob-

rem verò hoc nomine veniat, variè Dd. loquuntur. *Wesemb.* putat, eam ita vocari, quia non ad certam aliquam formam accommodari potest, cum ipsa negotia, unde oritur, sint varia & incerta, idcoq; præscriptis verbis in factum quodlibet à Prætorè informetur. Sed hæc descriptio fortè ad primam significationem explicandam pertinebit, uti & illa, quando ita vocari dicitur, quia deficiente actione vulgari, vel cum proprium nomen invenire non possumus, ipsum gestum describitur, & verba ipsa in ipsum factum concipiuntur, quo ita Prætori descripto, ipse eadem verba olim Judici præscribebat; unde præscriptis verbis *d. l. i. it. in factum*, & in factum Civilis dicitur. Melius attingere scopum illa videtur, cum hoc nomen invenisse memoratur propterea, quia proponebatur Conventio, h. e. negotium celebratum, uti gestum erat, & postea ex verbis illis præscriptis in factum agebatur: ideoque præscriptis verbis rem demonstrabat hæc actio, & ea demonstratio vice nominisungebatur, quâ caret. *Duar. ad l. 7. ff. de Pæf. Don. de Præscr. Verb. c. 21. n. 1. Vinn. §. 1. d. Loc. Cond.* Vocatur præterea civilis, quia jure civili interpretatione Prudentum *l. 7. §. 2. de Pæf. l. 5. §. 2. de P. V.* est prodita. *Habn. ad Wesemb. b. t. n. 1.* Describi potest Actio personalis ex contractu innom. directò descendens, civilis, stricti juris, competens ad contractum ex fide placiti implendum, vel ad præstandum id quod interest, *Ekkolt. ad b. t. n. 2.* Quæri circa eam à Dd. solet, an in omnibus casibus stricti juris sit: & excipiuntur articuli, Do ut des, seu quando ex permutatione & de æstimate agitur. *§. 28. Inst. de AÆ.* ubi Imperator post hæc verba, PRÆSCRIPTIS VERBIS: statim subjungit; QVÆ DE ÆSTIMATO &c. ut innuat particula QVÆ, non omnem actionem præscriptis verbis esse actionem bonæ fidei, sed duas has tantum, cum fermè appareant, esse species venditionis *l. i. ff. De Æstimator. l. i. de Rer. Perm.* Quo ipso intelligi potest, non Imp. arbitrio actiones alias esse bonæ fidei, alias stricti juris, sed quia earum natura ita fert: Nec enim Imp. rerum naturas vult immutare, licet illarum effectus impedire possit. *arg. §. 2. Inst. de Usuc. l. un. C. de Usuc. transform. §. 2. Inst. de Usufr. Bacchov. tr. de AÆ. Disp. 6. tb. 8.* Cæterum quoad hoc, dubium oritur, quòd hæc actio competat ad præstandum id, quod interest, cum tamen in obligationibus dandi præ-

præcisè res, ejusq̃ue dominium tradi & transferri debeat, *l. 75. ff. de Verb. Oblig. Sed resp. Hahn. in Not. b. t.* in his Contractibus hoc speciale esse, seu à regulis juris communis & certarum obligationum dandi naturâ recessum fuisse. Nec illud prætermittendum est, an hæc actio cum aliis civilibus & ordinariis actionibus concurrere possit? *Wesemb. f. b. t. posse* ait, additq; argumenta. Refellit *Wesembecium Ekkolt. Comm. ad Pand. b. t.* ejusq; rationes diluit, legendo vestigia *D. Hahn. ad Wesemb. d. l. n. f.* Quamquam lubentes fateamur, *Wesemb.* in multis, ubi corrigitur, conciliari posse, si ipsius, Præceptoris Germaniæ, honori velificari velimus: Nec reticendum fortè fuerit, eos, qvi ex ejus Commentariis sapere didicerunt, lucubrationum Illius nullam facere mentionem, quo vix à crimine plagii immunes sunt.

XVI. Veniendum nunc ad species Contractuum Innominatorum, quos Regulares cum *Dd.* appellabimus, ne fortè ex æstimatorio & permutatione, (si quidem eos sequimur, qvi eam ab articulo *Do ut des*, diversam non faciunt) obscuritas superfit, sufficere illas ad Contractuum Innominatorum species accuratè recensendas, *Padilla in Par. b. t. l. 5.* astruit: cum *Padilla* rationem reddes: Quia res & facta non amplius quatuor modis inter homines commutari possunt, hinc esse, quod quatuor species seu articuli contractuum Innom. oriantur: *Do ut des*; *Do ut facias*; *Facio ut des*; *Facio ut facias*.

XVII. De articulo *Do ut des* prima cura est, ut dispiciamus, an à permutatione differat. *Anton. de Padill. in l. 5. §. 1. b. n. g. Zoës. cod. n. 4.* nullum discrimen agnoscit. Calculum adjicit *Franz. n. 24.* h. modò ex hypothesi ejus notemus, consensum prævium ad dationem requiri, si debeat cum permutatione paria facere, cum alioquin etiam nuda ob rem datio esse possit. Qvi eandem faciunt cum articulo *Do ut des*, nituntur argumento *d. l. 5. §. 1. ubi quod in fronte §. 7.* Cui dixerat permutationem, in fine ait esse articulum *Do ut des*. Quam interpretationem si recipias, illustrare poteris autoritate *Vaconii à Vacuna* bonæ frugis Autoris, qvi *l. 1. Nov. Declarat. 27. Num. 6. p. 36.* ita scribit: Non enim permutatio est species, sed est duntaxat genus: *add. n. 4.* ex cujus fonte postea sua hausserunt *Dn. Franzk. & Ekkolt.* licet *Vaconii* nomine omisso. *De finis*

finiunt in hoc specifico significato permutationem sive Artic. Do ut des, esse contractum innominatum, quo res propria sive jure dominii, sive alius juris in re, ad eum finem datur, ut alia res propria vicissim ab accipiente danda sit, *arg. l. 1. pr. & § 2. de R. P. d. l. 5. §. 1. de P. V.* Alii volunt, ut quasi in classe quadam Porphyriana permutatio vices generis obeat, *arg. l. 1. de R. P.* cujus species sint Art. Do ut des, Do ut facias, Facio ut des, Facio ut facias. tot. *l. 5. de P. V.* In diversam planè sententiam eunt *Wesemb. b. 1. n. 10. Cass. Manz. Comm. Inst. §. 28. de Act. n. 12. Treutl. Vol. 1. Diss. 30. §. 7. lit. f. Anton. Fab. 6. Conject. 9.* existimantes, eò differre, quod in permutatione species cum specie, in Articulo Do ut des genus cum genere commutetur. Quod tamen rursus prius recitatam sententiam tenentes refutant, tum quod genus propriè tradi nequeat, tum quod Do ut des, ut & permutatio rerum tam generis quàm speciei sit, *per l. 5. §. 1. de Præsc. V. l. 1. pr. & §. 1. de Contrab. Emt. l. 1. pr. & §. 2. ff. l. 3. 7. C. de Rev. Perm.*

XVIII. Quomodo ab Emt. Vend. differat species Do ut des, quam, ut recensuimus, eandem cum permutatione constituent, tradendum nunc ex Interpp. est. Admodum enim vicina videtur *Emt. Vend. l. 5. §. 1. de P. V.* & tamen separata & propria Contractus Innominati species habetur, §. *it. precium Inst. de Emt. Vend.* Differre autem censent in eo, quod in Articulo Do ut des, seu in Permutatione res propria quælibet, quæ est in commercio, detur, ut ob rem datam vel pro re illa teneatur accipiens vicissim rem, de qua convenerit, quamlibet dare, *l. 1. D. de Rev. Perm.* in Emtione Vend. pro re pecunia requiratur, *d. l. §. 2.* sed quid si pecunia detur, ut merx detur aut contra? Gravis hic contentio est inter *l. 5. §. 1. b. 1. & l. fin. de Cond. causa data & c.* Interpretes horribilem eam antimoniam vocant. In utraque Lege de hac facti specie tractatur; Dedi tibi pecuniam ut rem v. g. Stichum dares. *Celsus in d. l. ult.* negat negotium illud pro Emt. Vend. habendum. *Paulo* Emtio Vend. habetur §. *1. hic. Franzk.* ut componat has lites, ex principio suo proposito, quid respondendum, decernit. Utrumq; Ictum rectè loqui ait, Celsum, ubi conventio nulla præcescit, Paulum, ubi præcescit. Illo casu Emt. Venditionem non esse, esse autem posteriori. Alii distinctione rem explicare nituntur; aut enim inqviunt,
initio

initio convenit de re certa, pro certo pretio tradenda, & est Emtio Vend. l. 5. §. 1. aut talis conventio non præcesit, sed alter demum accipiendo pecuniam obligatur ad rem vicissim dandam, & est Permutatio seu Contract. Innom. Do ut des. d. l. fin. Struv. Exerc. cit. 25. n. 16. At quid reponetur l. 1. §. 3. D. de Pact. omnem contractum in aliqua conventionione fundatum esse? alii clavem analyticos dubii in verbo *pecuniam* d. l. 5. §. 1. quærun: Quæ si pro precio sumatur, Emtio contracta erit d. l. 5. §. 1. §. 2. Inst. de Emt. Vend. Si verò pecuniam pro quantitate vel corpore, uti loquuntur, accipias l. 94. §. 1. D. de Solut. permutatio hoc negotiū erit, quæ conciliatio ex illis duabus legibus fluit. d. l. 5. §. 1. enim dicitur, quod, si pecunia pro re accipienda sit data, Emtio fit, ubi pecuniam oportet consistere in precio d. §. 2. Instit. de Emt. cum vero d. l. fin. D. d. Cond. Causa data &c. idem casus qui d. l. 5. §. 2. tractetur, aliud verò ibi fit prædicatum, nempe non esse emtionem, sed obligationem natam ex re data re non securā, id est, articulum Do ut des, necesse est, ut d. l. fin. pecunia sumatur pro quantitate, quod aptè quadrat in permutationem specificè sumtam.

XIX. Obligatio & actio ex hac specie descendens est talis, in quā id venit, non ut reddas, quod acceperis, sed ut damneris mihi, quanti interest mea, illud de quo convenit accipere. l. 5. §. 1. bte. Hoc loco illud monendum, ceteros ferè JCtos omnes recitatione horum verborum contentos, unum autem Franzklum eorum etiam rationes reddere voluisse. Ut reddat, ita differit. Quia omnis contractus conventionem quandam continet, & proinde etiam contractus Innominati, si conventio illa aliquid speciale operari debet, oportet certè aliquid aliud, quàm repetitionem rei operari. Repetitio enim nuda tunc conceditur, quando ob rem generaliter dedi, nullā præcedente conventionione. Sed quia ob rem datio genus quoddam contractuum est, & illius naturam omnibus contractibus, tanquam speciebus inesse necesse est; hujus verò est nuda repetitio: inde esse, ait, quod JCtus dicat, liberum mihi esse, si actione ad id quod interest, nolim uti, ut condicere rem meam possum, causa ex alterius parte non securā. Præter hanc ad interesse actionem, datur & illud ei, qui rem suam dedit, iudicium, ut adversarius vicissim rem tradere debeat. d. l. 5. §. 1. & quidem rem sa-

nam & incorruptam l. 4. l. f. C. de Rer. Perm. imò liberum est ,
rem datam conditione reperere, d. l. 5. §. 1. l. f. D. de Cond. Causa
data. &c.

XX. Superest ut casum l. 5. §. 1. adjunctum expendamus. Si
Scyphos tibi dedi ut mihi Stichum dares, cujus periculo Stichus
erit? videtur ad illum pertinere, qui Stichum non dedit, cum in-
dubitati juris sit, rem suo domino perire, l. 9. C. de Pign. Act. &
L. ult. D. de Cond. Causa data. &c. Ait autem JCtus, esse pe-
riculo ejus qui scyphos dedit. Ut hæc expediantur Coras. 2.
Miscell. 9. putat semper obtinere, ut periculum sit ejus qui dedit,
propter l. ult. D. de Cond. Causa data &c. textum autem in l. 5. §. 1. f.
hæc, ita interpretandum, esse quidem meo periculo, ut rem non
petam, non, ut datam amittam: id est ut accipiens scyphos libe-
reretur quidem præstatione interitus, non tamen accepti restitu-
endi necessitate, quia in d. l. 5. §. 1. etsi distinctæ obligationes non sint,
sed una tantum & unus contractus, duplex tamen sit actio, ubi
altera ad complendum, altera ad dissolvendum contractum
competat. Franzk. cum Hortens. ad d. l. 5. dicit, rectè Celsum in l.
ult. asserere, periculum & commodum, in ob rem datione, ante-
quam ab altera parte vicissim datum sit, nullum transferri: rectè
quoque Paulum in diversa specie permutationis asserere, hoc ip-
so in casu periculum in dantem transire, & eundem interpre-
tatione juris pro domino haberi, modò observentur ea, quæ de
ob rem datione, in qua nulla præcessit conventio, & de contra-
ctibus, ubi conventio præcessit, dicta sunt. Fortè & apparens
fronte primâ hæc discordia ex d. l. 5. §. 1. & d. l. fin. concors fieri
potest, si præsupponatur ex l. b. 18. actionem præscriptis verbis as-
similari actioni ex Empto, & qui dedit scyphos, instar emptoris
esse, qui verò illos accepit, pro venditore haberi, quasi vendide-
rit Stichum, sed nondum tradiderit; jam ponatur, emptoris peri-
culum esse, etsi res nondum sit tradita §. 3. Inst. de Empt. Condictio-
nem v. illâ ob causam datæ affinitatem habere cum conditione
ex mutuo, quæ licet res mutuata perierit, non extinguatur: ac ita
periculum esse ipsius accipientis scyphos dicemus ex d. l. fin.

XXI. Hæc sunt quæ circa primam speciem disceptare so-
lent Dd. Secundus articulus est Do ut facias. Cum hæc vicina
locat.

locat. Conduct. deprehendatur, primum omnium de discrimi-
 ne inveniendū, solliciti sunt. JCrus ait, si factum locari solitum
 sit, & pro eo pecunia detur, Loc. Conductionem esse, si res, hunc
 contract. Innominatum Do ut facias. Interpp. addunt,
 differre tūm ratione modi contrahendi, cum Loc. Conductio
 solo consensu, Do ut facias, rei interventu contrahatur: tūm
 ratione rei; quia in locatione conduct. merces in pecunia nu-
 merata, in do ut facias, in qvavis re aliā consistere possit *l. 8. §. 2.*
b. c. tūm ratione facti: cum locatio non in qvolibet facto sed
 qvōd locari solitum sit, ponatur. Exemplum est in labore Pro-
 fessorum, Advocatorum, qui tam nobilis in Rebusp. semper æ-
 stimatus fuit, ut omnem locationem aspernaretur; nisi qvidam
 sint & esse velint, qui instar agyrtarum propudiosè locant ope-
 ras, sibi ipsis conscii, illas nihil prodesse. *Donell. d. Tr. de P. V. Cu-*
jac. ad l. 7. de Pact. Struv. Exercit. 25. th. 25. Franzkius & hoc ad-
 ducit, qvōd licet & factum sit locari solitum, & pecunia pro eo
 detur, si tamen non ex conventionē præviā, sed factum sequente
 detur, non pro Loc. Conductione, sed Contr. Innominato. Do ut
 facias haberi debeat. *l. 22. hic, l. 10. §. ult. de Pign. §. 1. Inst. Loc.*
Cond. Si itaqv. res data sit, si sit factum qvōd locari soleat, nec
 fecero, duplex hic actio nascitur; una ex Contractu & directō
 ad contractum implendum, id est, actio Præscript, verb. altera ad
 id, qvōd datum est, repetendum, *d. l. 5. §. 2. Franzk. n. 32. hic. vid.*
Wesemb. hic. & Habn. ad eum. Treutl. eod. & ad eum Bacchov. Et
 id qvidem omnes expeditum esse dicunt, ubi qvis rem suam de-
 dit, & accipientis fecit, subesse autem difficultatem, si res aliena
 data fuerit, & postea evicta; v.g. dedi tibi servum, ut tuum ser-
 vum manu mitteres: manu misisti, & is, qvem dedi, evictus est;
 qvid hlc obtineat, qværitur? qvæ actio illi danda, qvi factum
 præstitit. JCrus ex natiyis JPrudent. principiis distingvit, *d. l. 5. §.*
2. fan sciens rem alienam esse, dederim, an ignorans. Et si qvidem
 sciens dederim, de dolo in me actionem dandam; si ignorans,
 civilem in factum. De hac facti specie diversæ apud Dd. opi-
 niones sunt. *Jason in hac l. 5. §. 2.* cum aliis in ea sententia fuit,
 hanc facti speciem ad Contr. Innominatum, Facio ut des, refe-
 rendam, ex eo argumento, qvōd Contractus Innominati non ex

conventionem, quâ sola non contrahuntur, sed ex implemento potius suo cognoscendi & æstimandi sint. Unde si id, quod datum est, evictum sit, perinde esse ac si nihil datum sit, & proinde cum alter reverâ fecit, hoc est, servum manu misit, & ita dationem alterius veram prævertit, ab ipso solo contractum nominandum esse, & pro facio ut des habendum, ex quo demum actio de dolo propriè competit. Quæ causa est, quod quidam hunc casum in § 2. expressum, cum sequen. §. conjungendum putent: *Gl. ut refert Jason. ad h. l.* quod tamen Cujacio haud probatur in *Par. h. l.* Verum nec hoc argumentum satisfacit. *Glosa. ad h. §. 2. & Salicet. ad eund.* argumenta argumentis opponunt, dicuntq; ex eo, quod Contractus ab initio suo & illo, quod essentiali illi est, non verò consecutione & accessione accidentali quadam, (loquor Stylo Jctorum) æstimandi sint. *Franzk. n. 34. 35. v. omnino Wesenb. D. de Pact. n. 10. p. 84.* Igitur nunc alia Disputatio subit. Num si est Contractus do, ut facias, ex illo indistinctè competat & sufficiat actio Præscr. verb. an verò actio de dolo interdum opus sit? *Gl. ad l. 5. §. 2. b. r.* actionem de dolo pro actione præscriptis verbis exponit, quæ actio præscriptis verbis propter dolum competit. Sed cum *Gl. Bart. &* alii rejiciant, videndum quid dubii sublit. Res obscura est propter dissensionem *Ulp. in l. 7. §. 2. de Pact. à Jcto nostro in hac l. 5. Ulpian. in c. l. Julianum* non distinxisse, sed hac ipsa in facti specie generaliter in factum actionem non Civilem sed Prætoriam dedisse refert. Deinde *Mauritianum* laudat, qui reprehenderat *Julianum*, & indistinctè actionem præscriptis verbis competere asserit. *Paulus in c. l. 5. §. 2.* *Julianum* distinxisse memorat, an quis sciens an ignorans rem alienam dederit, & pro diverso casu diversam actionem dedisse. Hos dissentientes *Don. tr. de Præscr. Verb. c. 13.* ita explicat: *Juliani* nempe sententiam in *l. 7. §. 2.* non integram scriptam esse, sed ex parte relata[m] saltem, in quantum scilicet ab eod. *Mauritianus* dissenserit: quando nimirum quis sciens alienum servum dedit: de hinc *Paulum* in *l. 5.* non approbare, sed referre saltem distinctionem *Ulpiani*. A *Donello* alienus *Franzk.* est *n. 36.* nam & integram *Juliani* sententiam ab *Ulp. in l. 7.* refertur existimat, à *Paulo* quidem aliquantò expressius, dum scientiam ab ignorantia, actionem de dolo ab actione in factum,

quæ illi subsidiaria est, sejungit, & distinctim exprimit, ab Ulpiano aliquantò generalius, dum in genere saltem loquitur, & actionem in factum Prætoriam, quæ extraordinaria est, civili, in factum, h. e. præscriptis verbis, quæ est ordinaria, opponit; & quia rationem etiam generalem à Synallagmate desumptam ex Manriano refert, & adductæ facti speciei ad commodat, verisimile esse putat, Maustitium omnimodò à Juliano dissensisse, & quemadmodum hic propter evictionem possessione avocata, nihil planè actum contractumve putans, *arg. l. 3. D. Act. Empt. l. 22. D. de Acquir. Possess. l. 14. de Except.* actionem civilem deficere, & extraordinariam in factum prætoriam dandam esse voluit, ita illum, quod *συνάλλαγμα* subit, h. e. res reverà, tametsi aliena, tradita non in terminis nudæ conventionis constiterit, civilem competere statuisse, & in hoc Julianum reprehendisse. Postquam hæc ita disseruit, dicit, hunc §. 2. à Triboniano interpolatum esse, & Juliano Pauloque voculam CIVILEM dicimendæ inter hos Jctos litis causâ additam, remque ita se habere, ut nimirum in adductâ facti specie, sive sciens sive ignorans quis servum alienum dederit, actio civilis, hoc est, Præscriptis verbis illi, cui evictus est, competat; priori casu de dolo coercendo, posteriori in factum saltem nudum, hoc est id, quod interest, præstandum: Consentiunt cum *Franzk.* de vocula CIVILI imperitè à *Triboniano* adjectâ *Cujac. Duar. in l. Juris Gentium, Wesenb. Par. n. 9.*

XXII. Consequens, est ut articulum Facio ut des cum Jctis consideremus. Si tu, posteaquam feci, cessas dare, Paulus loquitur, nulla erit civilis actio, & ided in factum dabitur. Illud hic primum in quæstione versatur, an ex hoc articulo etiam actio præscriptis verbis detur. Inter negantes *Zoes. est. Comm. b. l. n. 4. J. Petr. Osterm. in Colleg. Colon. Disp. 30.* hæc verba priscam ætatem & omnium Jctorum secula, prout verba habent, accepisse *Donell. verò in Traç. de Præsc. Verb. c. 20. Et l. 14. Comm. c. 35. Et l. 15. c. 40.* novam adinvenisse interpretationē dicit. Interpretatio ejus distingvendo absolvitur: aut enim qui fecit impleri contractum postulat, (ita loquitur) & tunc actio præscriptis verbis ei nō denegatur *arg. l. 3. l. 15 l. si polienda b. r. l. 7. §. 2. de Pact.* aut recedere cupit à Contractu, & tunc locus est *d. §. 3,* quod hic non detur condi-

Actio ad repetendum, facta enim infecta fieri non possunt, *arg. l. uerum ff. de R. J.* sed in ejus locum succedit actio de dolo, *l. 4. C. de dolo malo*. Donellū impugnat *Bacch. ad Treutl. h. t. lib. 10. & Treutlerus* monet, non recedendum esse à communi in judicando sententia, quamvis theoretica veritate inspecta quis cum Donello facere possit. Alii distinguunt, an ex facto utilitas aliqua ad alterum, qui dare debuit, pervenerit, an non? ita ut priori casu propter synallagma, quod subest, actio præscriptis verbis competat posteriori verò actioni de dolo locus sit, *Ludw. in Nov. Tit. 6. b. 1. f.* Nec multum ab hac sententia abit *D. Joh. Ott. Tabor. Partit. E. p. 3. f. 4. lib. 16. f.* distinguens ex *l. 15. D. b. t.* utrum in tali negotio manifestè dolus arguatur, nec ne: ut priori casu ad dolum corrigendum non hæc civilis, sed actio de dolo detur, *in d. l. 5. §. 3.* maximè si nulla ad eum, qui dare debuit, utilitas pervenerit: posteriori verò casu actio in factum præscriptis verbis competat. Quemadmodum autem Contractus Do, ut facias, incipit, quando à rei datione incipit Contractus, & illa initium præbet obligationi, ita hic est initus, quando à facto Contractus incipit, & propter factum prælitum alter obligatur ad rem illam, de qua convenit præstandam. *Struv. Ex. 25. n. 29. 30.*

XXII. De quartæ speciei, Facio ut facias, interpretatione postremò videndum, quâ factum quoddam præstatur, ut vicissim factum quoddam præstetur, aut interesse, *l. 5. §. 4. l. 9. l. 19. §. 1. l. 18. b. c.* Uti in omnibus speciebus, ita & hic investigandum, quâ ratione à quibusdam Contractibus huic negotio valdè similibus differat. Primum speciem Mandati præ se ferre videtur, quando nimirum operæ mutue præstantur, quæ aliàs in Contractum Mandati deduci possunt, *d. l. 5. §. 4. b.* aliquando Commodati, *l. si gnatauitam, 17. §. 3. eod. vel etiam Loc. Conductionis, §. prætereà 2. f. Loc. Cond.* si v. g. usus rei præstetur, qui aliàs commodari vel locari potest. Differt autem generatim ab his Contractibus, & propriam naturam habet, quæ consistit in eo, quod non certi generis facta requirat, sed quælibet admittat, & quod non ad certum contrahendi modum sit determinatus, sed quomocumque placuerit facta quælibet permutentur. Speciatim verò à Mandato con-

contraria existit, quod 1. non tam negotia gerenda, & 2. non gratis suscipiantur, & 3. non statim ex consensu, quò suscipitur, quis obligetur *l. 5. §. 4. A Commodato* alia est, quod itidem 1. non tam usus rei & 2. non gratis præstetur. *d. l. 17. §. 3.* Denique à Locat. Conduct. differt 1. quod factum ab alterutra parte promissum non sit merces. 2. non tantum unius rei vel opera locari solita in hunc contractum veniat, ac 3. quod non statim ex mutuo consensu de concedendo usu vel præstanda opera Contractus perficiatur, & mutua obligatio oriatur, *§. 2. 7. Loc. Cond.* Reliquum igitur est, ut is, cui factum est præstitum, obligetur ei, qui præstitit, ut vicissim factum vel interesse præstet. Atque ad persequendum hoc in iudicio datur illi, qui fecit contra alterum actio præscriptis verbis *d. l. 5. §. 4. d. l. 17. §. 3. beic. Franzk.* addit, quoad actionem in hoc articulo vel eandem distinctionem observandam, quæ in Contract. facio ut des, adhibita fuit, vel idèò facilius actionem præscriptis verbis competere, quod factum ex parte unius facis iusta causa esse possit obligationis, ut vicissim quid detur. Don. Struv. Bachov. sine distinctione actionem præscriptis verbis dari statuunt. Cæterum quæ ad facti speciem exprimendam pertinent, superius recensuimus.

XXIV. Subiectæ hætenus oculis sunt variæ interpretationes JCtorum. Nostra opera restat, quam huic argumento impertiri constituimus, quæ, quò sibi constet, imitabimur morem eorum, qui, ut melius interpretandi absolvant munus, ex Philosophia Morum altiora principia solent repetere, deinde, an quæ Legibus Rom. & JCtorum interpretationibus traduntur, cum hac doctrina congruant, declarare: quod èd etiam faciemus libentius, quia hunc morem multos summos Viros tenuisse videmus, Dn. Feldenum imprimis, qui nec hujus argumenti causas subinde in *Not. ad Grot.* investigare prætermisit; cujus etiam præceptis per aliquod tempus institutus fui. Fortè non ineieganter rem ita proloquemur. Certissimum est, sine Commutationibus societates humanas salvas esse non posse: cum enim natura eveniat, ut, quod alteri super sit, desit alteri *l. 1. de Contrab. Emt. Vend.* (quæ lex sat ostendit, JCtos Rom.

Rom. rerum moralium peritissimos fuisse,) ne singuli putantes se sibi ipsis sufficere, reddantur insociabiles, ut *Gracianus* loquitur de *Mari Lib. c. 1.* Aliter certè necessitatibus humanis confusi haud potest, quàm si homines inter se res & officia commutent. Duo quippe sunt, quibus indigemus ad vitam exigendam: Res & Officia, quibus etiam nulla vitæ pars vacare potest. Rursus & illud inducendo colligimus, non amplius quàm quatuor modis res & officia commutari posse. Aut enim rem cum re commutamus, aut rem cum officio, aut officium præstamus ut res detur, aut demum officium cum officio commutatur. At verò, cum omnes liberi homines sint, sive qui in civilem coierunt Cœtum, sive qui in universali Gentium societate vivant, illud inde efficitur, neminem teneri in alterius gratiam res suas alienare aut præstare officium. Quo igitur pacto alter qui indiget, necessitati suæ subveniet? vi auferre contra officium est, & summa demum necessitate quædam tenus excludatur. Fortè ergò ita erit, si par voluntas accipitur & redditur, hoc est, si declarent voluntatem suam, (quam tamen sufficienti negotii gerendi scientia instructam esse oportet; alioquin pro voluntate non habetur;) de rebus & officiis commutandis. Neque sic tamen satis consultum erit rebus humanis, nisi & necessitas imponatur servandi promissa. Qvis autem eam imponet? forte Natura: nam hoc quidem disputatione non indiget, honestorum turpiumve indicem conscientiam esse, adigereq; hominem, ad persequendum honestum, omittendum turpe: si igitur ab honestate non erunt aliena, quæ promissa sunt, hic conscientia implebit cogentis vices, imponetq; præstandi necessitatem. Sed enim si conscientia aut libidine corrupta aut sensu honestatis privata, adeò valida non est, ut eum, qui promissit, cogere queat, quid tum faciendum? ut cessent commutationes, per salutem Societatum committendum haut est. Ut ergò adsit, qui conscientia vices obeat, vi externâ adigendo ad præstandum conventa, necesse est. Atqui hic est, quem nos in civitate Judicem vocamus, cujus proinde munus erit, procurare commutationes salutaris humanæ societati, & obtemperare, quod semel conventum est, nolenti vim addere. Num autem omnibus promiscuè commutationibus vis addenda erit? an potius quædam naturali obligationi relinqvenda, quædam

dam autem externâ insuper vi urgendæ erunt? Sanè si omnes in universum commutationes erunt societati, in qua instituuntur, salutare, omnes etiam recipiendas & urgendas esse consentaneum est. Justum enim non aliter, quàm quod societatibus salutare est, definies. Sed quomodo perspicui poterit, quænam è salute societatum sint nec ne? fiet id generatim quidem, si justitiæ particularis naturam consideremus: cujus species una consistens ἐν τῇς συναλλαγμασι, id est, commutationibus *Arist. l. 5. Ethic. c. 11.* Commutativa dicitur, à Grotio Explerrix, & vulgò Arithmetica vocatur, fungiturq; suo munere, servando æqualitatem in bonis externis, ne alter alterum quoad ea bona lædat. Et hoc est, quod Imp. Justin. in suæ Jurisprudentiæ περὶ τοῦς multus sit in exponenda justitia, utpote fundamento infallibili, uti omnium Legum, ita & contractuum. *v. t. t. Inst. & Dig. de J. & J.* Paratissimiq; sunt, quæ de Principiis Juris scripserunt; (vid. instar omnium *Joach. Hopper. Tract. de Vera Jurisprud. l. 3. artic. 8. p. 178.*) principia justî & injusti (quod & Jctus facit *l. 1. de J. & J.*) arcescere ordinaria, (ita Dd. loquuntur:) interna, naturalia, à Rep. deducta, ex Deo, ex Mundo, ex Homine, ex Familia, Ethica, Physica, Logica, Mathematica, Politica, eaq; sicubi opus, (cum quandoque illorum principiorum ignorantia Jctis Rom. imputari velit) recitare & applicare. Ex qua nunc definitione illud existit, eas commutationes societatibus humanis salutare esse, in quibus à judice judicium de æqualitate observatâ fieri potest; hasq; ut frequententur, omni cura providendum esse. Speciatim autem quæ commutationes è re societatis sint, inde scies, si cujusque societatis ingenium accuratè introspexeris, & qua ratione hæcenus in Commutationibus sese gesserit, experientiâ didiceris. Ita enim & naturaliter salutaribus addi aliquid aut detrahi aut novæ introduci possunt. Hanc enim facultatem sibi proprium uniuscujusq; Civitatis jus vendicat, *arg. l. 6. D. de J. & J.* Illud adhuc quæritu dignum est, si Commutatio instituta sit, quæ nullam æqualitatem in se habet, nec etiam comprobari tanquam salutaris, judicio peculiaris cujusdam Civitatis, possit, in eaq; injustum unus ex Commutantibus patiatur, an adjuvanda à judice an relinqvenda sit. Videtur relinqvenda, cum, quod negotium salutare non sit, nec Commutatio-

nis naturam, quæ æqualitate constituitur, habeat, rejiciendum merito censeri debeat. Sed quia Jus universale Correctivum exposcit, ut corrigatur utique, quod injustum obortum est, melius administraturum iudicem suas partes, si adjuverit patientem injustum visum, quæ pollet, ut alter corrigi injustum patiatur, pronuntiandum oppidò erit.

XXV. Hæc sunt, quæ naturaliter ex Doctrina Civili afferre possumus. Quæ si cum cura inspicimus, apprimè cum Jurisprudentia Rom. congruunt. Retinere Romanos quatuor illa genera modorum commutandi res & officia à Natura ipsa constituta, accuratè docet Paullus in nostra *l. s. pr.* totius enim ob rem tractatum, id est, universam commutationum materiam in his speciebus competere scribit: Aut do tibi ut des, quod est rei cum re commutatio, aut Do ut facias, quod est commutatio rei cum officio; aut facio ut des, quod est, quando consequendæ rei gratia quis alteri præstat officium; aut facio ut facias, quando officium cum officio commutatur. Rectè etiam nunc illud cum Naturali jure congruere, clarum est, quod *Ulp. l. i. § 2. de Pæd.* tradit, omnem contractum in conventionem quadam fundatum esse. quæ definitur, duorum vel plurium, in idem placitum consensus (quæ definitio generica, si utilitatem summam in contractibus nominatis præbet, utique etiam in innominatis habebit, siquidem *d. l. 7. D. de Pæd.* illius generis species sunt conventiones nominatæ & innominatæ: jam juxta Philosophorum Scholam tota essentia generis est in subjctâ qualibet specie) liberrimo namque consensu liberos homines uti ad res suas alienandas aut officia præstanda ex adductis constat. Illud restat inquirendum, an Legumlatores Rom. discrimen salutarium, & quæ salutare non sunt societati hominum, commutationum observaverint rectè, numquid, salutaribus, id quod decet, addiderint vim, per iudicem cogendo contractantes, ut præstent, quod promissum est; rejecerint verò eas, quæ non eandem utilitatem habere videbantur. Quæstio eò spectat, an Romani commutationes eas approbaverint, vinculoque obligationis constrinxerint, quæ æqualitate constant, aut aliàs longo rerum usu salutare esse reperiuntur. Ut quæstionem discutiamus, videndum, quæ ratione æqualitas obtineri in commutationibus possit, nisi enim æqualia utili-

utilitate consequi possint homines, commutationes non facile instituent. Hic elegans nobis suppeditatur principium: Res, quæ commutantur, diversæ licet sint, exæquari posse, mediante utilitate rerum singularum, quam homines desiderant, & quam quælibet res homini in vita affert. Utilitatis hujus desiderium indigentia Philosophis vocatur, quam necessitate temporum & rerum metiendam esse, pulchrè cum *Jcto in l. 1. de Contr. Em. col- ligas*. Eodem modo de officiis seu operis, quas homo homini præstat, judicandum, in quibus æqualitas invenitur, si eorum utilitas, quam continent, æstimari possit. Et hæc commutationes quæ ita rebus & factis, per usum, quem habent, exæquatis, subeuntur, non possunt non salutare esse, quia & alter consequitur, quo indiget, nec conqueri potest; alterum plus, quam se commutando consecutum. Eodèq; etiam ut tales conventiones frequententur, maxime operè urgendæ sunt, necessitasq; iis à civilibus Legibus, ut præstetur, quod ita commutari placuit, imponenda. Quæ autem sic comparatæ non sunt, sed ubi res pro lubitu commutantur non habitâ ratione quantitatatis, qua altera alteram æstimat, tanquam inutiles querelesq; obnoxia reprobandæ, nullâq; LL. civilium Auctoritate, ut quæquam obligent, muniendæ erunt, nisi forè injustum ex accidenti obortum sit, quod correctionem desideret. Omnium elegantissimè his respondet *JCti sententia in l. 7. D. de Pat.* Quid enim aliud dicere voluit, quando ait: Juris Gentium conventiones quædam actiones pariunt, quædam exceptiones, quam hæc: Commutationes, quas Natura amicitia causa inter homines exigit, Gentes autem indigentia adductæ cæperunt celebrare, quædâ ita comparatæ sunt, ut Leges civiles necesse habeant ex iis actiones dare, quò teneantur contrahentes ex eo, quod conventum est; quædam a. eam utilitatem non habent, ut à civili Lege robur actionum iis addi ex usu sit; ideoq; exceptiones tantum pariunt, quæ ex generali Juris Gentium obligatione ortum trahunt. Et porro ex §. 1. *JCti* ita interpretamur: Commutationes seu conventiones, quas civiles Leges civiliter obligando, actionemque efficacem concedendo confirmare solent, cum habeant naturam certam, ex qua judex de æqualitate rectè observata, an secus, judicare potest, cumq; cognita LLtori sint, salutare esse so-

cietati Civili, ex generalibus commutandi nominibus egressæ, transferunt in proprium aliquod nomen, ita, ut cùm permutetur res cum re, aut res cum factio (sic tamen ut ubique attendatur utilitas, quæ res & factio habent, & ratione cujus æstimationem certam recipiunt:) non amplius hæc commutatio Do, ut des, Do, ut facias, sed ut speciali nomine insigniantur, & commutatio Do ut des, præsertim post inventum pecuniæ usum, quæ singulas res ratione utilitatis exactè æstimare potest, Emptio venditio, Do ut facias, Locatio Conductio nominetur, & sic porro. Ac postquam hoc ita evenit, (faciamus enim ita loqui) ut cognitæ salutareque inventæ commutationes proprium haberent nomen, Conventiones illæ, quæ quidem etiam generalibus commutandi modis annumerandæ sunt, cum plures non reperiri experientia compertum sit, nullam tamen certam naturam habent, Innominatæ ceperunt vocari. Quibus ipsis nulla à Legibus Civilibus tribuitur vis, ut ex iis quis obligetur, sicut fit per nominatas conventiones, aut quod ita promissum est, persequi quis possit. Licet v. in his non tam evidens benefaciendi promissitudo rebus & factis, sicut in illis, appareat, nihilominus tamen à Jure Gentium promanant; si itaque accadat, ut unus ex iis, qui Commutationem talem subierunt, ex ea commutatione lædatur, quod sit, si unus, quod conveniendo promissum est, impleat, alter verò implere nolit, tanquam salutare cum prioribus retinendæ, obligationisq; & actionis civilis robore confirmandæ meritò erunt *d. l. 7. §. 2. de Pact. vid. Hopper. de vera Jurisprud. l. 9. t. 27. de Contract. Innom. p. 566. & quidem ex Edit. D. Conringii, qui tanti æstimavit Hopperum, Regis Hispaniarum olim Consiliarium, quanti nullum alium Jctum.*

XXVI. His principiis subnixi naturam contractuum Innominatorum sequenti definitione exprimemus. Sunt nimirum conventiones, quæ nullam certam naturam eodq; nec nomen specificum, quod illam naturam repræsentat, habent, subsistuntq; in generalibus commutandi nominibus; producunt tamen obligationem & actionem Jure Civili ex implemento ad id, ut e. g. accipiens datum iterum restituere teneatur, aut ad dandum rursus sit obligatus.

XXVII. Nec specierum ampliùs natura nunc latet.

Do ut des, est Contractus Innominatus nullam certam naturam habens, eòq; nec speciale nomen, sed in generali rem cum re commutandi nomine subsistens; ex quo fit, ut non aliter jure civili obligationem & actionem producat, quàm si, qui dando implevit, injustum passus est, quod alter rursus dando non implevit.

Do ut facias, est Contractus Innominatus, nullam certam naturam, eòq; nec speciale nomen habens, sed in generali commutandi rem cum facto nomine subsistens; ex quo fit, ut non aliter jure civili obligationem & actionem pariat, quàm si qui dando implevit, ob causam, ut aliquid fieret, injustum passus est, dum alter non fecit.

Facio ut des, est Contractus Innominatus, nullam certam naturam eòq; nec nomen speciale habens, sed in generali facti cum re commutandi modo subsistens; ex quo fit, ut non aliter jure civili obligationem & actionem producat, quàm si, qui dando implevit, ob causam, ut aliquid daretur, injustum passus est, dum alter dando rursus non implevit.

Si dicta Contractui Innominato, **Facio ut facias**, accommodabis, addesq; obligationem & actionem non aliter producere, quàm si qui faciendo implevit, ut alter rursus impleveret, injustum passus est, eò quod alter rursus non fecit; species omnes absolutæ erunt.

XXVIII. Ex iis, quæ pro fundamento constituimus, & disertissimè l.5. pr. h. convenire, diximus, quod nim. omnes Contractus tam Nominati, quàm Innominati in quatuor illis, quos recensuimus, commutandi speciebus competant, deducimus nunc, posse Contractum **Do ut des**, incidere in emtionem venditionem, l.5. §.1. b. si enim convenerint duo, ut alter det rem suam, alter det precium seu pecuniam, quæ istam rem secundum certam & in conventionem determinatam quantitatem æstimet, **Emtio Vend.** est, cui assistunt Leges, utrisque convenientibus necessitatem imponendo, alteri ad rem tradendam, alteri ad pretium solu-

vendum : Quod si verò duo conveniant, ut res pro re detur, exq; convenientibus unus dando impleverit, Contractum Innominatum Do ut des, esse patet. Ex eodem principio cognoscimus, Do ut facias in locationem conductionem incidere posse : si enim pecuniam dem, ut facias, & quidem tantam, quæ hoc factum æstimet, locatio conductio est ; at si quam rem do, ut quid facias, non æstimando rem & factum, Contractus Innominatus, Do ut facias, nascitur. l. 5. §. 2. hic. Similiter potest aliquod negotium in commutandi modum Facio ut des, incidere, si tamen aut factum æstimabile non sit, aut quod datur, non detur, ut æstimans factum, manet nomen generale negotii Facio ut des. l. 5. §. 3. *beic*. Eadem causa est, quod Mandatum in modum commutandi Facio ut facias, incidere possit, quod tamen, si subtiliter naturam ejus expendamus, statim distinctionem nobis suppeditat, aliud esse Mandatum, aliud Contractum Innominatum, Facio ut facias.

§. XXXIX. Ex his, quæ diximus, obscurum etiam esse non potest, ante implementum hos Contractus obligationem naturalem parere : Præter §. 3. l. 7. *D. de pact.* ubi pacta nuda exceptionem parere dicuntur, inter quæ etiam Contractus Innominati ante implementum, numerandi sunt ; maximè id nobis persvadet *pr. ejusd. l. 7.* ubi Conventiones Juris gentium dicuntur omnestam nominatarum quam innominatarum : Certissimum autem est, Jure hoc Gentium omnes homines ex quâlibet conventionem mutuò obligari, in quâ alter alterius fidem est secutus, licet nulla solennis stipulatio aut implementum accesserit. Ita enim Paulus ait l. 84. §. 1. *de R. 7.* Is Natura debet, quem Jure Gent. dare oportet, cujus fidem secuti sumus.

XXX. Definitio nostra jam etiam satis manifestum reddet, quamobrem actio ex Contractibus Innom. Præscriptis verbis dicatur : quia enim Contractus Innominati nullam certam naturam habent, hinc non uno nomine Judici Prætor significare poterat officium in sententia dicenda, sed multis indigebat verbis, repetito pacto privatorum, in quo Contractus erat fundatus ; si nempe ex alterutra parte datio vel factum intervenerat, quod omnem hic paginam facit. Et sic clarus est etiam sensus l. 3. *D. Præsc. Verb.* quæ confugiendum in hanc actionem esse di-

se dicit, quotiens Contractus existunt, quorum appellationes
nullæ Jure Civili proditæ sunt. Negasse enim naturam nomina
his conventionibus, inde patet, quia nullam certam habere natu-
ram dicuntur, quam verba & nomina specifica, una quadam con-
ceptione repræsentare possint. Cur stricti juris esse perhibea-
tur, ratio ex definitione nunc quoque suppetit: in quibus enim
circa natura perspicui non potest, ex quâ Judex, quid, quale,
quantumve utrinque tribuendum sit, ex æquo decernere possit,
in his ita de placitis convenientium inhærere cogitur.

XXXI. Quare in obligatione & actione, quæ ex Contractu
Innom. Dour des, descendit, veniat id, ut damneris mihi, quanti
in meo est, illud, de quo convenit, accipere, aut si recipere
malum meum, ut reperatur quod datum est, quasi ob rem datum,
re non secuta, demonstrandum jam est. Causa ea est, quia cum cau-
sa obligationis ejus, qui accepit, non sit ex conventionem; aliâs e-
nim ad dandum, quod promissit, conveniri posset: sed ex re datâ,
quam non secuta est causa, ob quam res data est; inæquale hic na-
tum aliter corrigi non potest, quam si præstetur æstimatio ejus
damni, quod alter perpellus est, dum rem suam dedit, nec tamen
ab altero consecutus est causam, ob quam dedit. Si tamen ma-
licis, qui dedit, rem suam repetere, quam actione ad interesse ad-
versus alterum experiri ob incommoda, quæ sæpe in negotiis hu-
manis evenire solent; quando lucrum aliquod intendimus, & hic
modus corrigendi inæquale satis idoneus est, cum volenti hoc
vel illo modo sibi consulere, non fiat injuria. Et alter quidem
qui accepit, obligatus est ad restituendum ea, quæ ob causam da-
ta sunt, si ea non sit secuta. Sufficitque nuda ejus pœnitentia,
qui dedit. *l. Dedit §. sed si 2. de Condict. Caus. dat.* Cujus rei cau-
sa probabilis hæc reddi potest: quia, cum neuter convenientium
ex conventionem rem dare obligetur, ita nec, si dedit; Quod ta-
men cum cautione quadam accipiendum est, si nimirum res ad-
huc integra sit, impenis enim jam in rem promissam contrâ
dandam factis, iniquum esset, traditam rem ex pœnitentiâ repe-
tenti statim restituere, non etiam refusus sumibus. De acci-
piente quæri potest, an liberetur, si quod accepit, restituere para-
tus sit? sed notat J Cius, ita damnum ejus, qui dedit rem, non sa-

tis correctum esse, liberari tamen accipientem posse, & si non contra rem tradat, modò damnum ob non secutum implementum præstet §.1. *hic*: rationem hanc assignamus, quia uti in omnibus Contractibus Innom. ita & hac in specie non nisi voluntarium iustum est. *D. Feld. ad Grot. l. 2. c. 12. p. 21.* sicut itaque qui dedit, voluntate sua & pœnitentia rescindit Contractum, rem suam reperendo, ita & ab recipientis arbitrio pendet implere velle nec ne *l. 1. D. de Rer. Perm. vid. Wesenb. de Cond. Causa data & c. n. 3. & 4.* Jam quoque pugna *L. f. de Condit. Causa data & c. cum l. 5. §. 1.* hic faciliè componi poterit. Verum enim est, si pecunia pro re detur, emtionem vend. esse, si modo ut æstimans rem fuerit data, quod in emtione fieri necesse est, *t. t. de Contrab. Emt.* sin verò pecunia non data fuerit ut æstimans, sed quantacunque, in speciem Do ut des incidet negotium. Reliquum est, ut controversiam de permutatione, an eadem sit cum articulo Do ut des, decidamus. Posset probabiliter dici esse diversam. Licet enim JCtus in nostra *l. 5. §. 1. hic verbis: quia non placet permutationem rerum & c.* eandem facere videatur, res tamen posset faciliè conciliari, si vocem *Permutationis* hîc pro generali commutationis nomine acciperemus, non habitâ ratione, an res rem mediante utilitate æstimet, an verò res certa pro incerta detur. Titulum verò de rerum Permut. præcisè de tali commutatione intelligeremus, ubi res rem mediante utilitate metitur, quod etiam colligi posse videtur ex *t. t. de Rer. Permutat. & ex L. 1. D. de Contrab. Emt.* Verùm rectius fortasse cum plerisque Dd. haud differre ab invicem asseremus. Licet Dn. Puffendorf. *de J. N. & G. lib. 5. c. 1. §. 9. p. 618.* illorû subtile discrimen putet, est tamen Articulus permutationis ipsissimus articulus Do ut des; nec enim ita quis in rem suâ prodigus erit, ut caballum quantivis pretii pro alio quocunque eqvo habere velit. Tandem ex nostris principiis casus *l. 5. §. 1. f. b. & l. ult. D. de Cond. Causa data*, fortè non ineptè componemus, si dicamus in *d. l. 5.* scyphos accipiendos esse eos, qui æstimant Stichum, & hoc casu, quemadmodum in *Emt. Vend.* nondum traditæ periculum ad emtorem spectat, modò venditor culpam præstiterit, ita etiam periculum Stichi ad eum, qui dedit scyphos, spectare; in *l. ult. ff. de Cond. Caus. dat. & c.* pecuniam intelligendam esse non æstimantem Stichum, sed quantamlibet, ad eòq; hîc repetitionem locum

cum habere, quemadmodum in Contract. Innominatis receptum est, Stichum verò nondum datum periculo accipientis esse.

XX XII. Consequitur, ut quid de dubio, quod circa articulum Do ut facias, occurrat, sentiendum, explicemus. Pauli in *d.l.5. §.2.* verba hæc sunt: *Sed si dedi tibi servum, ut servum suum manumitteres, & is, quem dedi, evictus est, si sciens dedi, de dolo in me dandam actionem; Julianus scribit, si ignorans, in factum civilem, Ulp. l.7. §.2. de Pact.* ita habet: *Dedi tibi rem, ut tibi aliam dares, dedi ut aliquid facias, hoc σωἀδάγμα, id est, Contractum esse; & hinc nasci civilem obligationem; & ideo putorellè, Julianum à Mauriciano reprehensum in hoc: Dedi tibi Stichum, ut Pamphilum manumitteras, manu misisti, evictus est Stichus, Julianus scribit, in factum actionem à Pratore dandam: ille ait, civilem incerti actionem, id est, præscriptis verbis sufficere.* Nos duo hæc loca non dissidere pronunciamus: in *d.l.7. §.2.* quippe non distinguitur inter dantem scienter & ignoranter, sicut in *d.l.5. §.2.* præsupponendumque, quod ex omni Contractu Innom. duplex oriatur actio, una ad rem præstitam condicendam, sive repetendam, & ita ad rescissionem negotii, altera ad hoc completum ab uno complendum quoque ab altero. Prima actio audit Condict. Causâ datâ Causâ non secutâ: quæ quia civilis actio est, institui nequit, si factum sit præstitum, id est, Pamphilus sit manumissus, quia facti nulla est repetitio: De dolo igitur contra scienter dantem agendum erat *d.l.5. §.2.* si verò ad complendam causam agere velis, supererit actio civilis, quod Paulus *d.l.5. §.2.* tanquam notissimum præsupposuit: nec turbent *d.l.7. §.2.* verba hæc: *in factum actionem à Pratore dandam:* Hic enim olim omnes actiones dare solitus erat. Nec & fortasse absurdum erit, si litem hoc modo componere tentemus. Res ita habet: Paulus procul dubio de eo casu loquitur, ubi jam ab utraque parte implementum est secutum. Igitur questio est, si alteruter implementum est læsus ab altera parte, quæ quid implevit, sed ita, ut implementum nullam utilitatem afferat ei, qui faciendo implevit, quæ actione experiendum sit? Actio Præscr. verbis locum habet, quando implementum ab altera parte nondum est secutum, ut impleatur aut præstetur interesset; ergò hæc competere non potest, ubi jam ab omni parte implementum est secutum. Distinctione igitur rem expedire conatur JCrus: aut enim,

qui implevit dando, scivit rem esse alienam, & in dolo est, dum alterum allexit ad faciendum, quod aliàs non fecisset; & in hunc actionem de dolo dandam existimat; aut verò ignoravit; & cum ita suâ intentione omne perfecit, quicquid incumbabat, ne tamen alter injustum patiatur, qui ratione rei familiaris detrimentum accepit, nec tamen pro facto quicquam consecutus est, concedendum ipsi putat, ut experiiri contra alterum actione in factum possit, quâ, universam facti seriem enarrando, petit, ut ab altero æstimationem damni, quod perpeffus est, consequatur. Quod si ponamus, Julianum his rationibus dubitandi, quas dedimus, indutum ita distinxisse, prout in l. 5. distinxit, Mauritiano verò & Ulpiano, qui Mauritanii sententiam probat, eas non venisse in mentem, in promptu erit, ingentem hanc litem dirimere. Cæterum libenter damus, parùm obfuturum, an ex tali facti specie actionem præscriptis verb. an verò in factum dandam dicamus; cum enim res ferè eodem recidat, & tantundem hac, quàm illâ, consequamur, ex subtilitate tamen juris non aliter pronuciare licet.

XXXIII. Quæ subfit ratio, quare ex Contractu Facio ut des, civilis actio non detur, exequi nunc convenit. Cum enim Do ut des, Do ut facias, datione impleta, obligent eum, qui accepit rem datam, vel ad restituendum, quod accepit, vel ad præstandum interesse, si rursus implere nolit, negat Paulus implementum facti, quia tale, aptum esse ex se ad pariendam obligationem & actionem talem, qualis ex implemento dationis nascitur. Hic nobis rectè videntur Dd. causam ex utilitate factorum æstimâsse. Quod si enim ex facto nulla utilitas ad alterum pervenerit, qui promisit dare; cum actio præscriptis verb. heic non possit habere locum, eò quod faciendo alter nullum damnum patitur; nec itidem conditio, cum factum restitui nequeat, nihil restat, quàm ut dicatur, alterum dolosè fecisse, dum spe lucri alterum in escavit ad faciendum, quod aliàs non fecisset, adeoq; ex dolo suo obligari.

XXXIV. Finem operæ imponit articulus Facio ut facias. Facit hic eadem causâ, quæ in præcedente specie signata fuit, ut hic cum quibusdam Interpp. non simpliciter actione præscriptis verbis ex hoc articulo competere existimemus, sed eandem, quâ in artic. 3. opus fuit, distinctionem adhibendam esse, censuimus. Adducit nos in eam sententiam naturæ a factorum, quæ vel detrimentum asferre fa-

facienti, vel nec cum facientis damno, nec cum accipientis commodo conjuncta esse possint.

XXXV. Exercuerunt nos hæcenus rationes & causæ, quas ob rem dati tractatus, uti nostrâ l. 5. pr. vocatur, rectius intelligendi causa, reddere interfuit. Superesset ea cura, ut indicarem, quantum Dd. interpretationes à nostra abeant, aut cum ea conveniant. Verùm cum eà saltem fini eorum sententias recensuimus, ut illis ob oculos positis collatisqve, de certo tandem principio iudicium fieri possit, accommodandi industriam cujusqve studio relinqvimus, præsertim cum & odiosum futurum esset, quicquam in tam Excellentibus Viris carpere, nostraq; præponere velle, utpotè cum illud diverbium nostrum sit: Discentes in Jure Romano oportet credere, usq; dum ad statum subactumq; iudicium perventum fuerit. Finiemus igitur. Finiendo erratorum veniam precaturis, qui nihil in his magnopere suum censet, præter congerendi qualemcunqve diligentiam.

DEO SIT GLORIA.

Ad Clarissimum, Doctissimumq;

DN. GEORGIUM MICHAELEM HEBERUM,

Wittenbergensem,

Amicum perdilectum,

Cum

de

INNOMINATIS CONTRACTIBUS

disputaret

Autor.

DUm, Mi HEBERE, de illis Contractibus Innominatis, Nominibus charybdū scyllarūq; plenissimis, verba facis, miratio penes mentē subit, cur, missâ factâ JUSTINIANI IMP. doctrinâ, simplici non insistens viâ, difficiliora primū adamasti? Sed pro Te excusatio est, de-
yora-

voratis enim, sub optimis Epicharmis, Qui cō-
modiora instillarunt fundamenta, super Juris-
Prudentia Romana laboribus, ostendere Wittē-
bergen siliterato Orbi voluisti publice, nihil esse
tam arduum, qvò non ignea ingenii vis penetra-
re possit: ac imposterum, auguror, auctumnita-
te judicii ornate dabis ea in vulgus, qvæis ARS
ÆQUI BONIq; splendescat magis: qvò etenim
proximiùs ad hanc lucem accedimus, cò mage
incalescimus, ac celum consistere nescium imi-
tamur: Tu siquidem, ut *meum Plutarchum*, *παιδαγωγῆς* §.122. exprimam, nullatenus aliarum,
qvæ vocantur *Encyclicarũ*, *Disciplinarum*, neq; au-
ditiōe, neq; spectatiōe experses: qvibus tanqvā
alis qvis citissimè ad Templum Juris Consultorum
doctrinis edita ferena pervolare habet: Veniant
utinam in Scholas Nostrum Jura Romana Pro-
ficientium imbuti bene Disciplinis aliis liberali-
bus adulescentes, sponderem audènter, fore, ut
intra brevissimũ spatium spebus * votisq; suis
sint potituri, modò præconceptæ opiniones fa-
cessant, & illi, qvamdium discunt, credere possint.
Hisce Te, HEBERE, salvere, valereqve jubeo.
E Museo meo 24. Septembr. ANNO M. DC. LXXIV.

P R Æ S E S.

* Sic Salvianus, Josepho Scaligero Christianissimus Scriptor
judicatus; Tr. *cont. Avaritiam* Lib. II. p. 79. ut spebus votiùq;
potiantur: & p. 80. Totum deniq; inter homines spebus agitur:
solum DEUS est, de qvo desperatur.

